

Sotescrit l davegnir de Fascia

La cordanza de program "Fascia tel davegnir" é stata firmèda da la Procuradora Cristina Donei e dal president de la Provincia Lorenzo Dellai



L president Dellai con la procuradora Donei, l president del Consei General Bernard, l vizeprocurador Cloch e l'assessor regionèl Chiocchetti.

Politica - En jebia ai 7 de messèl del 2011 l'é stat sotescrit "Fascia tel davegnir", la cordanza de program anter l Comun General de Fascia e la Provincia autonoma de Trent. La Procuradora Cristina Donei e l President de la Provincia Lorenzo Dellai, tedant a duta la jonta di ombolc e chela provinzièla i à pojà sia firmes su n document che raprejeta proprio l davegnir de duta Fascia. N nef svilup unitèr scomenzà acà n an, ai 14 de messèl del 2010, canche l'é nasciù ofiziamenter l Comun General de Fascia l'an passà e che per la pruma outa met ensema i besegnes e la prospetives da Penia a Moena.

Te Comun General a Poza da doman bonora se à binà la jonta provinzièla che l'à rejonà di ponc a l'orden del di olache l'era ite enche la nomina de la dotora Marilena Defrancesco desche nef dirigent del Servije mendranzes de la provincia de Trent. Dò la jonta, i

ujes de la sala grana é stac averc enche al public, che à podù tor pèrt a la firma de la pruma cordanza de program anter la Provincia e na Comunanza de Val: "Fascia tel davegnir".

L'é stat n moment storich, de gran valuta e de gran emportanza, fosc l più gran enschin ades dò la naa del Comun general. La firma del protocol "Fascia tel davegnir" ge dèsc gran poder al Comun General che ades l podarà tachèr, semper col sostegn de la Provincia, duc i lurieres metui ite te la cordanza che la se poja su trei filons de basa: l'identità ladina, l teritorie con particulèra atenzion a l'ambient dolomitich e l'economia veduda desche capacità de svilup che l cogn esser semper de più en sinergia con la cultura e l'ambient.

"Fascia tel davegnir" l'aea ja abù l'aproazion tant del Consei General che de la Jonta provinzièla, ma dant de firmèr l'era stat domanà n

confront en più con la Provincia. Coscita dal confront e da la condijion con i servijes e i assessorac de la Provincia se é rué a pojà la firma su chel "gremen de idees" metudes jù su la chèrta e che ades les podarà esser convertides te azions e lurieres concrec.

I ambic tematics olache se jirà a lurèr i tol ite: l svilup de la rees de conescion per la mobilità e la comunicazion eletronica; l stravardament de la promozion de l'identità con la politica de lengaz e de la cultura ladina; l stravardament e la valorisazion del patrimoniè ambientèl; la promozion del turism; l potenziament di servijes sozio sanitères con l rinforzament del capital sozièl. Te la pratega ge vegnarà dat priorità

a la circonvallazione de Ciampedel e Cianacei, vegnarà fenì chela de Vich e se jirà enche a fenir la strèda de la rodes che lea duta Fascia. Dapò vegnarà dat enche l met de comedèr la costion de la strèda sun Fedaa e de didèr i operadores che à intenzion de fèr fora sia strutures. No vegn tout ite la costion de l'impiant sun Marmolèda per l moment e per la costion del la viabilità sui jouves tant la Provincia che l Comun General fèsc a saer che no i é a una per meter sù n daz.

Amò vegn scrit de la politica de lengaz, de la cordanza del Ciadenac, de Cèsa Costazza e de l'area de Sèn Jan e per ogneun de chisc ponc l'é stat metù dant l'obietif e l'empegn da pèrt de la Provincia per l portèr a compiment. Sibie la Procuradora Cristina Donei che l president de

la Provincia Lorenzo Dellai, ma enche l president del Consei general Cesare Bernard e l'assessor a la mendranzes Luigi Chiocchetti, à palesà sodesfazion e orgolie per la sotescrizion de la cordanza e i à uzà fora te si descorsc la volontà de portèr inant con gran empegn i obietives scric sul papier per realisèr fin junfon l dezentràment autonomistich e la devoluzion de la competenzes ai enc periferics a la basa de la reforma istituzionèla de la comunanzes de Val. L president Dellai à sottrissà che te n moment de crisa internazionèla l Trentin somea esser na ecezion ma "l'é semper debeseegn de fiduzia e de empegn. Chest somea che sie n descors banal, ma la robes emportantes no les é mai banales, l svilup no l nasc da l'èlber di dejideries, l'é enveze l frut del sacrificie, del lurier, e se se jirà inant coscita descheche la é dò a fèr Fascia, chesta sarà dassen na bona cordanza che la raprejeta n gran vèrch no demò dal pont de veduda programatich ma enche dal pont de veduda istituzionèl, che ge dèsc na posizion de gran valuta a duta la val e sia jent ti confronc de duta la provinzia".

Inant de serèr sù la sentèda, la Procuradora ge à consegnà al president Dellai na statua de legn che raprejeta n om col guant da fascian.



Dellai e Donei à sotescrit la cordanza "Fascia tel davegnir".